



Broj: 02/a-05-1-1190/21

Sarajevo, 5. 7. 2021

SARAJEVO

| | | | |
|------------------------|-----------------------|------------|--------------|
| PRIMLJENO: | 28-07-2021 | | |
| Organizaciona jedinica | Klasifikaciona oznaka | Redni broj | Broj priloga |
| | | | |

B

***Drugi samit predsjednika parlamenata zemalja Zapadnog Balkana i Evropskog parlamenta,
Brisel, 28. juna 2021. godine***

Predsjedavajući Doma naroda Parlamentarne skupštine BiH Bakir Izetbegović uoči održavanja 2. samita predsjednika parlamenata zemalja Zapadnog Balkana i EP-a prisustvovao je sastanku Odbora za vanjske poslove Evropskog parlamenta (AFET) s predsjednicima parlamenata zemalja Zapadnog Balkana.

Predsjedavajući Doma naroda Parlamentarne skupštine BiH je prilikom obraćanja istaknuo da Odbor za vanjske poslove Evropskog parlamenta ima veoma značajnu ulogu u procesu evropskih integracija, te da aktivnosti, stavovi i preporuke ovog odbora predstavljaju značajne smjernice kako za Parlamentarnu skupštinu BiH tako i za ostale institucije uključene u integracijski proces. Sadržaj posljednjeg izvještaja o Bosni i Hercegovini koji je pripremio izvjestilac Paulo Rangel, kao i amandmani poslanika i način na koji su ti amandmani tretirani, pokazuju visok stepen poznavanja i razumijevanja prilika u Bosni i Hercegovini, njenih potreba na putu ka članstvu, a naročito potvrđuju opredijeljenost članova ovog odbora za evropsku budućnost BiH. Naglasio je da je punopravno članstvo u Evropskoj uniji jedan od strateških ciljeva BiH, te da su dobrodošle sve preporuke koje doprinose dostizanju tog cilja, a naročito one koje se odnose na jačanje vladavine prava, demokratskih institucija i uklanjanje diskriminacije u postojećem ustavnom okviru i izbornom zakonodavstvu. Uvođenje evropskih demokratskih standarda, onakvih kakvi se prakticiraju u državama članicama EU i koji onemogućavaju bilo kakav oblik diskriminacije na etničkoj, vjerskoj, teritorijalnoj ili bilo kojoj drugoj osnovi, prioritet je za Bosnu i Hercegovinu.

Predsjedavajući Doma naroda zahvalio se članovima Odbora za vanjske poslove Evropskog parlamenta na prepoznatoj potrebi uključivanja predstavnika svih parlamentarnih stranaka, uz posredovanje predstavnika EU i angažman civilnog društva, u razgovore o reformi Ustava i izbornog zakonodavstva. Redovna komunikacija i koordinacija aktivnosti s ovim odborom, Evropskim parlamentom i ostalim institucijama EU od suštinske je važnosti za put BiH ka članstvu u EU. Pandemija COVID-19 otkrila je pune razmjere važnosti tē saradnje. Predsjedavajući Doma naroda Parlamentarne skupštine BiH podsjetio je da se Bosna i Hercegovina suočava i s migrantskom krizom, te da veliki broj ilegalnih migranata, koji žele doći do zemalja Zapadne Evrope, ulaze u Bosnu i Hercegovinu kao tranzitnu zemlju, a da im

je prolaz dalje prema Zapadnoj Evropi onemogućen. Koncentriranje migranata isključivo u dijelovima države u kojima žive muslimani predstavlja humanitarni i sigurnosni izazov za lokalne zajednice i institucije Bosne i Hercegovine. Uprkos izazovima, dodao je, Bosna i Hercegovina je nastavila sa ispunjavanjem obaveza na evropskom putu, te je ostvaren značajan napredak na ispunjavanju 14 ključnih prioriteta iz Mišljenja Evropske komisije o zahtjevu Bosne i Hercegovine za članstvo u EU. Dodjeljivanje kandidatskog statusa Bosne i Hercegovine već u ovoj godini bila bi jasna poruka i značajan podsticaj institucijama uključenim u integracijski proces, donosiocima političkih odluka, a naročito građanima BiH, koji su u ogromnoj većini opredijeljeni za evropsku perspektivu države.

Predsjedavajući Doma naroda Parlamentarne skupštine BiH Bakir Izetbegović prisustvovao je 2. samitu predsjednika parlamenata zemalja Zapadnog Balkana i Evropskog parlamenta u Briselu, na poziv predsjednika Evropskog parlamenta Davida Sassolija dok je predsjedavajuća Predstavničkog doma Parlamentarne skupštine Bosne i Hercegovine, gđa. Borjana Krišto pomenutom Samitu nazočila u online formatu.

Predsjedavajuća Predstavničkog doma Parlamentarne skupštine Bosne i Hercegovine, gđa. Borjana Krišto je tokom svog obraćanja na Samitu kazala kako je u procesu napretka ka Evropskoj uniji učinjeno nekoliko značajnih koraka, ali da je taj put dodatno opterećen raznim problemima i izazovima unutar same BiH. Jedan od najvećih izazova na tom putu, naglasila je predsjedavajuća Predstavničkog doma Parlamentarne skupštine BiH, svakako je izmjena izbornog zakonodavstva u smislu primjene osnovnih demokratskih standarda, kroz uvažavanje demokratski izražene volje sva tri konstitutivna naroda u BiH i svih njenih građana. Naglasivši kako su izmjene Izbornog zakona u skladu sa odlukom Ustavnog suda BiH o legitimnom predstavljanju konstitutivnih naroda i presudama Evropskog suda za ljudska prava i jedan od 14 ključnih prioriteta iz Mišljenja Evropske komisije o zahtjevu Bosne i Hercegovine za članstvo u EU, predsjedavajuća Predstavničkog doma Parlamentarne skupštine BiH je istaknula da Bosna i Hercegovina može i mora pronaći dovoljno unutrašnjeg potencijala za dogovor i prevladavanje sada već kroničnih izazova, isključivo na tragu evropskih vrijednosti, traženja kompromisa, dijaloga i konsenzusa. Govoreći o negativnim posljedicama pandemije korona virusa, predsjedavajuća Predstavničkog doma Parlamentarne skupštine BiH je posebno naglasila negativan utjecaj pandemije na ekonomiju. Na poseban način negativnim posljedicama pogođeni su izvoznici, a kada govorimo konkretno o privredi BiH negativne posljedice najviše su osjetili izvoznici proizvoda biljnog i životinjskog porijekla, posebno oni koji se bave izvozom crvenog mesa, jer i uz sve napore koji su do sada uloženi tržište EU i dalje je zatvoreno za crveno meso iz BiH. Osvrćući se na trenutnu epidemiološku sliku koja je znatno povoljnija kako u zemljama regije tako i u BiH i obzirom da BiH trenutno ispunjava kriterije za stavljanje na zelenu listu zemalja, predsjedavajuća Predstavničkog doma Parlamentarne skupštine BiH je potcrtala da očekuje od Evropske komisije pozitivno mišljenje kada je u pitanju olakšanje prelaska granice i neometano kretanje državljana BiH unutar EU. Na kraju izlaganja predsjedavajuća Predstavničkog doma Parlamentarne skupštine BiH je zaključila kako očekuje da je vrijeme preostalo do kraja godine ključno u kontekstu ukupnih napora na dobijanju kandidacijskog statusa i stvaranju evropske BiH koja jedino kao država visokog stepena institucionalne sigurnosti za pripadnike

sva tri konstitutivna naroda može dati svoj puni doprinos EU kao prostoru mira, sigurnosti, stabilnosti i prosperiteta.

Predsjedavajući Doma naroda Parlamentarne skupštine BiH govoreći u okviru teme „Osnovna uloga parlamenata u procesu proširenja Evropske unije (EU) u periodu nakon COVID-19“, istaknuo je da parlamenti imaju ključnu ulogu u tom procesu. Podsjetio je da je Bosna i Hercegovina ostvarila određeni napredak u ispunjavanju 14 ključnih prioriteta iz Mišljenja Evropske komisije, ali da je pandemija koronavirusa značajno uticala na dinamiku aktivnosti.

Izmjenama Izbornog zakona omogućeno je održavanje Lokalnih izbora u Mostaru, Parlamentarni odbor za stabilizaciju i pridruživanje je profunkcionirao i redovno održava sastanke, usvojeni su Strateški okvir za reformu javne uprave u BiH i Akcioni plan za reformu javne uprave, te Revidirana strategija za rad na predmetima ratnih zločina. Započeta je izrada Programa integriranja BiH u EU, a u toku je, ili je pred nama, razmatranje i usvajanje važnih zakona koji se odnose na jačanje demokratije i vladavine prava. Upozorio je da je neophodno prevenirati nove talase pandemije kako bi se zaštitili zdravlje i životi građana, oporavila ekonomija, ali i intenzivirao rad na provođenju reformi. Istaknuo je da više od 75% građana Bosne i Hercegovine želi pridruživanje EU, ali da ta podrška može i treba biti unaprijeđena. Ne treba dozvoliti da ona bude ugrožena razočarenjima, neutemeljenim dilemama i dezinformacijama. Zajedno s institucijama EU, a naročito s Evropskim parlamentom, treba raditi na očuvanju svijesti o dobrobiti evropskog puta. U tom kontekstu je kao pozitivne istaknuo snažne poruke Evropskog parlamenta, poput posljednjeg usvojenog izvještaja kojim se pruža podrška evropskoj perspektivi BiH, te dodatno jača opredijeljenost građana za nastavak puta ka članstvu u EU. To ujedno obavezuje i Parlamentarnu skupštinu BiH da, uprkos političkim razlikama u Bosni i Hercegovini koje se nerijetko čine teško premostivim, aktivnije pristupi ispunjavanju obaveza koje Bosni i Hercegovini mogu najprije donijeti kandidatski status, a zatim i članstvo u EU.

Predsjedavajući Doma naroda ocijenio je da je Zapadni Balkan dio Evrope u svakom smislu, te da ne smije ostati izoliran i da građani regije moraju dobiti jasno uvjerenje da se to neće dogoditi.

Predsjedavajući Doma naroda Parlamentarne skupštine BiH poručio je da je dodjeljivanje kandidatskog statusa za Bosnu i Hercegovinu u ovoj godini od vitalne važnosti. Kandidatski status bi građanima, ali i donosiocima odluka u BiH, probudio optimizam i dodatno učvrstio vjeru u evropsku budućnost. Govoreći o jačanju parlamentarne saradnje u procesu proširenja, predsjedavajući Doma naroda Parlamentarne skupštine BiH pohvalio je ulogu Evropskog parlamenta, te je istaknuo potrebu održavanja i unapređenja saradnje na multilateralnom, ali i na bilateralnom nivou. Saradnjom i ostvarenim rezultatima se, naglasio je, uskraćuje prostor za dezinformacije i skepticizam.

Samit je okončan potpisivanjem Zajedničke deklaracije predsjednika parlamenata zemalja Zapadnog Balkana s predsjednikom Evropskog parlamenta.

Predsjedavajući Doma naroda Parlamentarne skupštine BiH Bakir Izetbegović sastao se 29. juna 2021. godine u Briselu s Angelinom Eichhorst, direktoricom u Evropskoj službi za vanjske poslove (EEAS) za Zapadnu Evropu, Zapadni Balkan i Tursku. Na sastanku je razgovarano o evropskoj integraciji Bosne i Hercegovine, s posebnim fokusom na ispunjavanje 14 prioriteta iz Mišljenja Evropske komisije o zahtjevu Bosne i Hercegovine za članstvo u Evropskoj uniji. Eichhorst je, pozdravljajući napredak koji je ostvaren u ispunjavanju prioriteta, istaknula da integracija Bosne i Hercegovine u Evropsku uniju ima njenu punu podršku, ali i podršku visokog predstavnika Evropske unije za vanjske poslove i sigurnosnu politiku Josepa Borrela i cijele Evropske komisije. Bakir Izetbegović upoznao je Eichhorst s dosadašnjim i planiranim aktivnostima u vezi s reformama Ustava i izbornog zakonodavstva Bosne i Hercegovine, naglasivši potrebu uključivanja predstavnika svih parlamentarnih stranaka i međunarodne zajednice u razgovore o ovoj temi. Predsjedavajući Doma naroda Parlamentarne skupštine BiH ponovio je važnost dodjeljivanja kandidatskog statusa Bosni i Hercegovini u ovoj godini. Također je razgovarano o aktuelnoj pandemiji koronavirusa, njenom zdravstvenom i ekonomskom aspektu, te o ilegalnim migracijama.


Istog dana predsjedavajući Doma naroda Parlamentarne skupštine BiH Bakir Izetbegović sastao se u Briselu i sa izvjestiocem Evropskog parlamenta za BiH Paulom Rangelom. Predsjedavajući Doma naroda Parlamentarne skupštine BiH iskazao je zadovoljstvo sadržajem Izvještaja o Bosni i Hercegovini, a koji je Evropski parlament usvojio i kojim se pruža puna podrška evropskoj integraciji Bosne i Hercegovine. Na sastanku je razgovarano o provođenju 14 ključnih prioriteta iz Mišljenja Evropske komisije o zahtjevu Bosne i Hercegovine za članstvo u Evropskoj uniji. Istaknuto je da Bosna i Hercegovina ima priliku dobiti kandidatski status već ove godine, te da je u tom kontekstu potrebno uložiti dodatne napore u reformu pravosuđa i borbu protiv korupcije, te provođenje presuda Evropskog suda za ljudska prava. Sagovornici su se saglasili o postojanju potrebe za uključivanjem predstavnika svih parlamentarnih stranaka i međunarodne zajednice u razgovore o reformama Ustava i izbornog zakonodavstva, s ciljem pronalaska kompromisnog rješenja kojim bi se uklonili svi postojeći oblici diskriminacije u ustavnom okviru i izbornom sistemu Bosne i Hercegovine. Paul Rangel je naglasio posvećenost evropskoj perspektivi Bosne i Hercegovine, te spremnost Evropskog parlamenta i ostalih institucija Evropske unije da se, skupa s institucijama i donosiocima odluka u Bosni i Hercegovini, posvete provođenju reformi i dinamiziranju puta Bosne i Hercegovine ka članstvu u Evropskoj uniji.

Izvještaj pripremila:

Naida Mulalić


Izvještaj odobrili:

Borjana Krišto



Bakir Izetbegović



Dostaviti:

- Kolegiju Predstavničkog doma PSBiH
- Kolegiju Doma naroda PSBiH
- Kolegiju Sekretarijata PSBiH
- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću PSBiH
- Sektoru za međunarodne odnose i protokol PSBiH

Kopija: Ministarstvo vanjskih poslova BiH